

Ezinduentzako oporraldiak antolatu ditu Gorabidek

G.A. / BILBO

Gorabidek, ezindu psikikoen aldeko Bizkaiko elkarteak, 550 laguntzako oporraldiak eta aisialdiko jarduerak antolatu ditu udako hilabete hauetarako.

Ezintasun psikikoak dituzten 503 laguntzako udako hemeretzi programa ezberdin prestatu ditu Gorabidek. Elkarrekin prestatu dituen 149 begirale bolondresen laguntzarekin, ezindu psikikoek opor egun batzuk igaroko dituzte Espainiako hainbat tokitan. Esate baterako, Bartzelona, Arenys de Mar, Pineda de Mar, Santander edo Venta Baños bezalako udalekuetan eguraldi onaz eta hondartza gozatu ahal izango dute.

Aldi berean, Gorabideko 18 ume eta gaztetxok Bizkaia, Gipuzkoa eta Arabako Foru Aldundiek antolatutako Udaleku eta Udagaztean hartuko dute parte uztail-abuztu zehar. Ekimen hauetan ezintasun psikikoak dituzten haur eta gaztetxoak besteekin batera jolastu eta bizi dira egun batzuetan. Gorabideko bolondresak haur hauen jarraipena egiten dute udalekuak irauten duen bitartean.

Gorabideko beste hamabi gaztetxok, berriz, Eusko Jaurlaritzak antolatzen dituen lan eremuetan hartzen dute parte. Era berean, ezintasun psikikoak dituzten beste 20 haur eta gaztetxok aisialdi elkarteek antolatzen dituzte kanpamenduetan izaten dira.

Ezindu psikikoak dituzten familientzako atsedenaaldiak antolatzen ditu Bizkaiko elkarte honek. Uda honetan Gorabidek 21 laguntzako tokia du Plazakola erresidentzian.

Aurkezpen ekitaldiak hasiera eman die UEUko Iruñeko XXIII. ikastaroak

UEUko zuzendaria eta Nafarroako zein EAEko gobernuetako partaideak izan ziren bertan

Atzo hasi zen Iruñean Udako Euskal Unibertsitatearen (UEU) Udako Ikastaroen bigarren ekitaldi nagusia. Baionan aurreko astean burututakoaren ondoren, atzotik hilaren 29ra bitartean Iruñeko Larraona ikastetxean eskainiko dira UEUko XXIII. ikastaroak.

NEREA AMIGOT / IRUÑEA

Miren Azkarate euskaltzainak Hizkuntza ereduen inguruko sarrera hitzaldia egin aurretik, Kepa Altonaga UEUko zuzendariak agurra eta ongi etorria eman zuen. Zuzendariak gain, Angel Perez Nafarroako Gobernuak Hizkuntz Politikarako Zuzendaritzako ordezkaria eta Jokin Azkue Eusko Jaurlaritzako Kultura Saileko ordezkaria ere izan ziren aurkezpen ekitaldian.

Kepa Altonagak oso positibotzat jo zuen UEUk ia mende laurdenean egindako ibilbidea. Bere ustez, orain dela hogeita lau urte zenbait euskaltzalek UEU eratzea proposatu zutenean «inor gutxi imajina zezakeen orduan ekimen hark halako ibilbide luzea izango zuenik; euskararen mundua eta unibertsitatearen mundua uztartu nahian egindakoa alegia». UEUren garrantziaren erakusle, Altonagak hiru zenbaki aipatu zituen: 1970etik hona, gutxi gora-behera 700 ikastaro eta 8.000 hitzaldi eman dira eta 12.000tik gora ikasle izan dira udako ikastaroetan.

Apirilean UEUk egindako lehen kongresuan eztabaidatutakoari buruz daturik eman ez zuen arren, «han erabakitakoaren isla ikastaro hauetan igerriko dela» uste du zuzendariak. Ildo horretatik, gaiei dagokienez «beti bezala dimentsio akademikoa



Nola Nafarroako hala EAEko gobernuetako ordezkariak Larraonan izan ziren atzo.

OSKAR MONTERO

zaintzeaz gain, dimentsio sozialari ere garrantzi berezia ematen saiatu» direla adierazi zuen; inguruko errealitateko gaiak jorratu eta gizartearen arazoak gaineko gogoetak planteatu, alegia.

Angel Perez Nafarroako Gobernuak Hizkuntz Politikarako Zuzendaritzako ordezkariaren aburuz, euskarari dagokionez «gauzak franko aldatu dira Nafarroan» 1977an UEUko ikastaroak aurreko aldiz Iruñean egin zirenetik hona. Perezek ibilbide honen «lekuko eta erdutzat» jo zuen Udako Euskal Unibertsitatea; bere hitzetan, UEUk «erakutsi digu aurrera

egiteko modurik hoberena zuzeneko lana dela eta bidea ibilean egiten dela».

Angel Perezek adierazi zuenez, Nafarroako Gobernuaren «hizkuntz helburu nagusia euskararen erabilaren normalizazioa» da eta xede hau «erakunde publikoen, pribatuaren eta herritarren ahaleginak batuz soilik» gauza daiteke. Ildo horretatik, UEUren lana nabarmendu zuen Perezek: «Nafarroa mailan unibertsitatearen hutsunea betetzen du, oraindik ere garatzeko bidean dagoena». 1990ean Nafarroako Gobernuak eta UEUk sinatutako lankidetzak hitzarmenak «bizi-

rik» dirauela eta «aurrera segi» nahi dutela azaldu zuen, sinetsiak baitaude «horrek onura ekartzen diola nafar orori».

Jokin Azkue Eusko Jaurlaritzako Kultura Saileko ordezkariak adierazi zuenez, Euskal Herriko Unibertsitateko (EHU) hainbat adarretan euskararen erabilera nabaria da eta UEUk zeresan handia izan du horretan, bereziki irakasleen eta materialen prestakuntzan. Azkueren iritziz, formazio akademikoaz gain ikasleek behar dituzten ekintza kulturalak, gogoeta bideak eta talde-lanean aritzeko aukera eskaini die UEUk.

Azkarate: «Hizkuntz eredu egokiak aurkituz, euskaraz bizitzeko ahalmena izango dugu»

N.A. / IRUÑEA

Miren Azkarate euskaltzainaren sarrera hitzaldiak hasiera eman zion atzo Iruñean UEUren Udako Ikastaroen bigarren ekitaldiari. Orain dela hiru urte euskaltzain oso denak, hizkuntza ereduen inguruan hitz egin zuen Larraona ikastetxean.

Azkarateren iritziz, batasuna ez da euskarak hurrengo urteetan duen erronkarik handiena, «hizkuntz erregistro edo erabilera maila bakoitzeko eredu egokia aurkitu beharra» baizik. Bere ustez, «egoki sentitzen ditugun ereduak aurkitzen ditugun neurrian bakarrik izango dugu osoki euskaraz bizitzeko ahalmena»;

izan ere, eredu egokiak «naturaltasuna» ematen dio hizkuntzari.

Eredu hauen eraikuntzan oraindik ere erantzun gabeko galdera ugari daudela aitortu zuen Azkaratek, baina bere hitzetan «galderak eginez hasten omen da jendea erantzun bila». Hasteko, hizkuntz ereduak zein ezaugarri behar dituen aztertzen euskaltzainak eta, bere ustez, eredu izateko bi baldintza bete behar ditu: zuzentasuna eta egokitasuna; «ezinbesteko baldintza gramatika akatsik, hutsik ez izatea eta Euskaltzaindiak batasunerako emandako arau eta gomendioak betetzea da» bere ustez. Dena dela, bi ezaugarri izan arren gerta daiteke darabil-

gun hizkuntza modu hori egokia ez izatea, «pedanteria edo arlotekeria» erortzeagatik.

Gaur egun nagusi den hizkuntza estandarrean entzun daitezkeen akats nabarmenak ere gogorarazi zituen. Batez ere, haurrek darabilten hizkuntza dela eta kezkatu agertu zen Azkarate, zeren D ereduaren eskolatu-tako haurren hizkuntza ere maiz akatsez josia dago. Ildo horretatik, «geureari ez diogu nahikoa atxikimendurik izan» adierazi zuen; askotan etxean ikasitako euskara baztertzeko dugu bere ustez, «apala eta pobrea» delakoan. Bere aburuz «etxeko euskalkien transmisioa indartu behar dugu eta eskolakoarekin aberastu».

EUSKO JAURLARITZA

LURRALDE ANTOLAMENDU,
ETXEBIZITZA ETA
INGURUGIRO SAILA



GOBIERNO VASCO

DEPARTAMENTO DE ORDENACION
DEL TERRITORIO, VIVIENDA
Y MEDIO AMBIENTE

IRAGARKIA

ARABAKO LURRALDE HISTORIKOKO AGURAINEN 4 ETXEBIZITZA SOZIAL ESLEITZEKO ESPEDIENTEARI HASIERA EMATEA

1995eko uztailaren 17ko Euskal Herriko Agintaritzaren Aldizkarian 1995eko ekainaren 20ko Agindua dator argitaratuta, Lurralde Antolamendu, Etxebizitza eta Ingurugiro Sailburuarena, Arabako Aguraingo udalerrian lau (4) etxebizitza sozial eta haur etxebizitza ganbarak esleitzeko espedienteari hasiera emateari buruzkoa, era berean, herri horretako Udaletxeko Iragarki-Taulan dago jendearentzako ikasgai. Agindua horretan 4 etxebizitza eta haur etxebizitza ganbara horien esleipenari buruzko baldintza guztiak datoz erasota eta, bertan adierazten denez, eskabide-orriak aurkezteko epea hilabeteko izango da, aipatutako Agindua Euskal Herriko Agintaritzaren Aldizkarian argitaratzen den hurrengo egunetik kontatzen hasita.